

BAB V

KACINDEKAN JEUNG SARAN

5.1 Kacindekan

Sabada ngayakeun panalungtikan ngeunaan babasan jeung paribasa Sunda nu aya patalina jeung ngaran babagian awak, dumasar ulikan semantik, anu nganalisis tina jihat aspek harti jeung warna hartina, bisa dicindekeun saperti ieu di handap.

- a. Babasan jeung paribasa nu ngandung ngaran babagian awak téh kapanggih aya 240, anu nyoko kana 198 babasan jeung 42 paribasa. Ngaran babagian awak nu kapanggih dina babasan jeung paribasa kapanggih aya 69 jinis. Tina jumlah sakitu téh bisa dipasing-pasing jadi dua wanda, nyaéta ngaran babagian awak dumasar cicingna jeung ngaran babagian awak dumasar wujudna.
- b. Ngaran babagian awak dumasar cicingna kabagi jadi tilu, nyaéta: (1) ngaran babagian awak luhur, anu kapanggih aya 35 jinis, nyaéta amis cau, beuheung, beungeut, biwir, jsté., (2) ngaran babagian awak tengah (badan), anu kapanggih aya aya 25 nyaéta, angen, balung, bayah, beuteung, curuk, dada, jsté., (3) ngaran babagian awak handap, anu kapanggih aya 17, nyaéta bincurang, birit, bitis, bool, bujur, bulu, dampal, jsté., jeung (4) ngaran babagian awak, kapanggih aya tilu jinis, nyaéta awak, badan jeung raga. Ngaran babagian awak dumasar wujudna kabagi jadi dua, nyaéta: (1) ngaran babagian awak luar, anu kapanggih aya 45 nyaéta amis cau, beuheung, beungeut, beuteung, bincurang, birit, jsté., jeung (2) ngaran babagian awak jero, anu kapanggih aya 20 nyaéta angen, ati, balung, bayah, caréham, daging, genggerong, jsté.
- c. Maksud nu dikandung dina babasan jeung paribasa ngaran babagian awak, kapanggih aya 3 nyaéta: (1) babasan jeung paribasa piluangeun (wawaran luang), anu kapanggih aya 171 babasan jeung paribasa, (2) babasan jeung paribasa paréntah (pangjurung laku alus), anu kapanggih aya 19 babasan

- jeung paribasa, jeung (3) babasan jeung paribasa pituah (panyaram lampah salah), anu kapanggih aya 50 babasan jeung paribasa.
- d. Harti idiomatik babasan jeung paribasa ngaran babagian awak, anu nuduhkeun harti injeuman jeung harti babandinganana, kapanggih aya 4 harti idiomatik anu bisa nuduhkeun (1) harti idiomatik sipat, (2) harti idiomatik kaayaan, (3) harti idiomatik tempat, jeung (4) harti idiomatik hal. Babasan jeung paribasa nu ngandung harti idiomatik sipat kapanggih aya 62 babasan jeung paribasa. Babasan jeung paribasa nu ngandung harti idiomatik kaayaan kapanggih aya 82 babasan jeung paribasa. Babasan jeung paribasa nu ngandung harti idiomatik tempat kapanggih ngan ukur aya hiji babasan jeung paribasa. Babasan jeung paribasa nu ngandung harti idiomatik hal kapanggih aya 95 babasan jeung paribasa.

5.2 Saran

Sabada ngayakeun panalungtikan ngeunaan babasan jeung paribasa Sunda dina ulikan semantik, aya sababaraha nu hayang ditepikeun, di antarana:

- a. Ieu panalungtikan téh karék tepi kana ngaran babagian awak wungkul. Unsur nu lianna, kayaning ngaran sasatoan jeung ngaran tutuwuhun sarta unsur babandingan nu séjenna mah can kapaluruuh.
- b. Panalungtikan ngeunaan babasan jeung paribasa teu ngan saukur tina tilikan semantik wungkul, tapi ku pamarekan élmu-élmu lian ogé bisa.
- c. Panalungtikan semantik henteu ngan saukur diterapkeun kana babasan jeung paribasa, bisa ogé diterapkeun kana sisindiran, sajak katut kabeungharan budaya lianna.
- d. Babasan jeung paribasa Sunda perlu dihirupkeun deui, boh di lingkungan sakola boh di lingkungan masarakat.
- e. Pikeun masarakat, babasan jeung paribasa Sunda perlu dihirupkeun deui, dipaké jeung dilarapkeun dina kahirupan sapopoé.
- f. Pikeun masarakat umum, babasan jeung paribasa Sunda kudu dimimitian sangkan dipaké deui, sabab mangrupa tittinggal karuhun anu kacida alusna.